





**Kochuam Chanchin** : Kochuam Chanchin bu, Manipur ah Chanchinpha Lut dan leh Vaiphei Kochuamte chanchin hi Rev. T. Zuanlal, B.A., B.R.E., M.A.R in a zik, Synod Literature & Publication Board (SL&PB) in a published, ₹ 300/- ah chawk thei a hi.



**Pathian Biak Kikhawp Puihuaina Bu** : Synod Literature & Publication Board in a published Pathian Biak Kikhawp Puihuaina Bu (Revised and Enlarged, 2023) hi a man umlo ah Kochuam Upa zosia'n Synod Office ah lâk zing thei a hi.



**Vacation Bible School Kaihuaina** : Rev. Lalsangbera in a zik Pu Langlalthamuan in a ledaw Vacation Bible School Kaihuaina, Teacher's Handbook hi Kochuam tin a mamaw te'n a man umlo a Office ah lâk thei zing a hi.

To,

---



---

*If undelivered please return to* - TPC Office,  
P.O. Box - 107  
D. Phailian,  
Churachandpur - 795128  
Manipur, India



ESTD. MARCH 2008  
FEBRUARY 2024

# Hinna Vâk

AN ORGAN OF THE TANGPHAI PRESBYTERIAN CHURCH



## A KHUTPÊK LOPI SUNGAH

- Ka belamte vâk in
- Khanglaite leh Sex Education
- Bible pawimawna

## PATHIAN THILPHÛT

Zawlnei Mikah Lekhabu pumpi hi i et leh Pathian chu a mite chung ah a lungawilo thu leh thilphût a nei thu hi a ki mui. Bung 6na hi i et chun vaihawmna court room sung a hi. Pathian chun Thutanpa (*Justice*) leh a hêktupa (*Plaintiff*) a kawp hi. Zawlnei chu Pathian â ding ah Ukil (*Lawyer*) in a pang ah, Israel mipite chu ngaw ah um (*Accused*) a hiu hi.

Lalpa chun a mite a hêkna thu ah hiatpitu (Witness ding in Sinai tang te chu a ko hi. A ziak chu a suak Mosi tawh a thuthun lai ua khan Sinai tang hin a hechian a hi. Thuthung bawm sung ah umte haw chule hiatpitu in a ko bawk ah, Pathian thuthung sukdetna ahi ziak un. Aigupta gam a pat a khut hat ah a puina haw kha ngaitua ah Pathian hi a thutiam ah ginum a hi zia a sulang bawk hi.

Zawlnei chun Pathian thasang ah thugen in, a mite chu tutiang tiang ah miphalemte hinkhua mang ah Ginum Pathian masang ah a kilat ngam uh chu mak a sak thu a gen hi. Tichun Pathian thilphût chu a puangdawkw tai:

- o Dik tak ah bawl
- o Lungsiatna ngaisak
- o Thunuaigol tak ah Pathian tawh kitawn

Pathian thilphût hi thil haksa ei puai. A phûtlo thildang piak i gaw zaw sek ua, zia haw hi haksa zaw hilo a hem? Mikah 6:6-7 ahin-Bongno kum khat ah upa, belamchal sang tamtak, sathau luipi singkhat, cha upa pen ah kithawi te haw hi ei phût leh bang i law diam? Aw Pathian thilphût hi bailam tak a hi bawl tamai hi tiu.



## **Kochuam Huang**

### **RMHS Teacher 2 - lakbe thu**

Synod Service Board Meeting 5:2 chun Rostad Memorial High School Confined Teacher undergraduate mi pani (2) lâkna ding ah Interview ko ahia, Interview bawl mi 34 laka mi 2 lâk ahiau ah, mi 2 hi waitinglist ah kawu a hi. Ziate chu zia a nuai ah gual hi a hi.

#### **Lâk ah umte :**

- 1) Chingthianhoih (B. Sc.) D/o Jangkhosat, Thingkangphai
- 2) Gracy Niangneichong Baite (B.A) D/o Ngamsei Baite, Makhao Mission Veng

#### **Waiting list ah umte :**

- 1) Kimdeihthing (B.A) D/o (L) Songkholian, Gangpimual
- 2) Daisy Neimuankim (B.A) D/o Kailunlal Vaiphei, Bethel Veng

### **Synod Kalendar sukdikna**

2024 Synod Kalendar chu a diklona a um ziak in zia a nuai ah gual a hin sukdik a hi.

#### **Pastor Bial KKP Conference:**

January 19-21 kiti himaleh  
January 26-28 hizaw di a hi.

### **KNP Vaihawm Kikhawp:**

March 8-10 kiti hi March 1-3 hi zaw di a hi.

### **KKP General Conference :**

March 15-17 kiti hi March 8-10 hi zaw di a hi.

### **Pastor Bial KKP Conference nei zaw thu**

Gamsung buai ziak ah Pastor Bial khenkhatte chun Bial KKP Conference mang theilo in um maleh Bial tamzawte'n, a ngaina gual hilo maleh, Vaihawmna leh Kikhawpna ah matthei a hi.

### **KNP Vaihawm Kikhawp thu**

KNP Vaihawm Kikhawp 9-veina chu March 2-3, 2024 sung in New Lamka Kochuam Biak In ah New Lamka Bial in zintun ding a hi. Zia hun a hin Vaihawmna, Thuzil latna leh Rev. PB Zosaphara in thugenna nei ding a hi.

### **KKP General Conference thu**

KKP General Conference 13-veina chu March 9-10, 2024 sung in Jubilee Kochuam Biak In ah D. Phailian Bial in zintun ding a hi.

## “A KHUTPÊK LOPI SUNGAH”

~ Rev Vanlalchhuanga  
i/c Lamka Pastor Bial

**K**hut hi bangkim i sepna ding in a pawimaw a, a phachuam ma ma hi. Khut panglo in bangma i bawl thei pua’u ti leu hin le genkhial khel lo ding ihu.

Mihiam in na i sepna pen chu i khut hi ahia, a pawimaw dan gen ding hileu hin gen seng puai tiu. Ziakiakchun, Pathian in a phatchuam dan leh a pawimaw dan a hia, khut ei siam piak a hi.

Mihiam khut a pat in thil lopi tak tak siamdaw a hia. I hindan sudanglam thei leh ei theng danglam thei te, i damna dingte leh i nawpsakna ding te siamdaw a hi. A lopi ma ma hi! Mihing khut in a bawlthei bawn a lopi ahi chun, a siamtu khut vang chu banggual in a lopi ta diam!

Rev Edmund Simon chun Isai 49:2 na chu kingakna’n mangin Pathian khutpêk lopi zia Lâ in a phuak hi.

*‘A khutpêk lopi sungah, Thil bang gual hung tung leh le ka muang zing’*

Mihiam in i mamaw mama uh, a pan lo ah hinkhua nuam thei lo chu ‘bitna’ a hi. Thamuang tak ah i um ua, i tawi vel theina ziak uh chu, i bit uh ahi ti iki hiat ziak uh a hi.

Pathian in a khut ah chun ei selgu’u a ( Isai 49:2), Pathian khutpêk lopi sung ah chun selgûk in i um ua. Thil phalo leh lungngai um tak hung tung leh le i bit uh a hi. Pathian khutpêk lopi sungah um chu a bit in, bang dang in le ei khawi pha thei pua, i bitnau chu Pathian tha zâk nuai in a

um hi.

Hepi Pathian chun a angsung ah ei pawm a, ei wawp bit tu a hi. Bangtik lai inle ei nusia lo ding a hi. Zia khut lopi a chun bangkim a um a, bangkim ama siam vek a hi. Tâng sâng tak te, guam thûk takte a siam a; thing leh gammangte, thalêk te, ganhing zosia te leh, mihing te, van laizawl tiang ah ni leh tha, aksi te natiang ah ama siam vek a hi.

Zia khut chun damlo a hi dam a, mithite kaitho in thiguapi leh guapi te a vau thip ah. Mi sâng tam tak a vâk vâ kit hi. Pathian khutpêk lopi chun bangkim a hithei a, hepina in zia khut chun ei tu zing a hi.

Lopi leh bangkim hithei himaleh, nang leh kei ei hepi

bêk ziak in zia khut lopi chun bangma hitheilo gual in a um kit ngal a. Zia khutpêk lopi chun 'ka hun hepi hi' ei tia, thing kros ah chun a khen den tau a. A mak ma ma ziang hi! Bangma a hitheilo na tak chu 'zawna' a hi kit ngal a. Zia ziak a chun, nang leh kei in 'hin' i nei khawlaw tau a. A lopi mama ziang hi!

Zia khut chu a hât a, a ginum a, i chau mama lai hun ah le Ama chu a danglam ngai lo a hi.

La hinkhua a hung hâtlo a, haksatna a hung tun hun in le, la hinna kha Ama ah chun nga le chin, zia khut hât tak chun hun humbit ding a hi.

A khutpêk lopi sungah selguh ihu.

- 
- *Sungkuan hi khawvel ah mite umkhawmna pawl lian pen leh detdo pen ding ahia, Sungkuan a hung lawsap chun khawvel ah Pawl zosia hi lawsam vek ding a hi. Ziazia khun, Sungkuan pha din daw hi khawvel ah na pawimaw pen a hi.*

~ Dr. Kenneth Chaffin

---

# “KA BELAMTE VÂK IN” (Johan 21:7)

~ Rev. Thanglianlal  
i/c New Lamka Pastor Bial

**Thumapui :** Kochuam a gingtute vâkna/chawpna hi khawvel Kochuam dang dangte haw'n le a ngai pawimaw'u leh a ngai thupi penu khat a la hi. Marka zika Jesu'n a nungzuite kiangin “Nangun nêk ding pia un” (Mk. 6:37) a la ti gual a khan, i Bible châng teldaw'u a hin (Jn. 21:7), Lal Jesu Vên ah a kalto masang in nungzuite kiang in thu vaithak pawimaw tak a nei a zia chu “Ka Belamte vâk/chawm in” ti hi a hi. Lal Jesu'n Peter kiangin, “Ka Belamte vâk in/ Ka Belamte enkawl in” ti hi thumvei hial gen in a sawl hi. Gingtute vâk ding leh enkawl ding in Kochuam a Pastor leh Upate hin nâ a semkhawm uh a hi. Kochuam etkawl leh vâkna hi zil mite leh namdet mite bawl ding in i ngai deu a, zia khêl a hin thugen thei mi deu guat bik i nei kit hi. Zia hin kochuam etkawl leh vâkna hi ngai pawimaw leh dutui a ngaizia a sulang hi.

## **Kochuam a vakna/chawpna pawimawna :**

Kochuam ah Gingtute vâkna/chawpna hi thil pawimaw ma ma a hi ziakin dutui a ngai hi. Mi a gen theilo sa-sa a gensak hâm hâm-te hi bawlo a phai. Thu hisello gen chîngte diak diak chu a gen theilote sangin a hawilo zaw diak nalai hi. Pawl sunga mi nuak khak ding venna a hem, mi a nungchanguh siamphatna ding tupna ziak a

hem a guat sek hin, kochuam in a thuak khawlaw sek hi.

Mihingte hin anpha inêk chun, i taksa a hung hawi a, ei suhat a, anphalo inêk chun i taksa'u a susia, damlona ei tut ziang sek hi. I thagau lam hinkhua le zia gual tho chu a hi. Gingtute chu Belam tawh tekhn i hiu a, Belamte gualin i du du ine, i pilvanlo sek ziakin ei â dinga pha keilote le ine lût mai sek a, i damlo khawlaw

ta sek hi. Kochuam vâktu/ chawmtu-te chun, anpha a chawm thei dingin anpha leh phalo hiatchian a pawimaw ma ma hi.

**Pathian thutaka chawpna :**

Gingtu vakna/chawpna Thu phapen chu bang a hem? Pathian Thu Bible tilo dang a um puai. Zia bep hi Thugin leh Thilhi têna diklo theilo chu a hi. Kingakna tingzo leh belchian dawl pen a hia, Lal Jesu kianga midangte puilutna ding leh gingtute sukhatna ding in Bible khêl a matchak hawizaw um theilo a hi. A hinla, Bible Thu gendawk chiat leu hin le, eima dawidan Bible thu kaikawitu a um sek hi. Bible châng khenkhat mal lâk ah mani dawi dan dan kawksak ziang hin Bible Thutak gen a hi diak puai.

Zia ziak chun, gingtute vâkna/chawpna bawl ding chun Bible Thutak a hetchian masak dingu a hi. Bible Thupi a hin Thupi lian leh neu deute a um a, Thupi lian zawte hi vakna/chawpna ting pen chu a hiu. Thupi neu lamte hin gingu a chawm piting zo tak - tak pua, zia gual tho a chun,

thil matchak neu deute hinle thil thupi tak a siam dawk zo seklo mawng hi ti ihiau. Khrista kiangah mite puilut leh Khrista batna lam a seiletsak dingah chawpna khêla thupi hawi zaw a um theilo a hi. Thupi khenkhat diklo taka gente, Bible Thupi dang gennep deu leh, Ual bik neite, tawt thanguai leh nuizat siamna neite, midang hatlona gen thatnawpte hin Pathian lama kuama a tilhat ngai puai. Zia guala bawlsekte hi bangma helopi kihetsakte umdan mai a hi. Thu hisêllo Kochuam sunga gen a hi phat tak leh gingtute lakin kikhenna a pawt seka, chuleh, Pawl sunga hotute gensiat leh kikaihuaina dan gensiat-te leh vaihawmna thu gensiatnate hin thil khawk tak a sua a, kochuam in a thuakta sek hi.

**Thukhakna :** Kochuam a Belamte/gingtu vâktute hi a pilvang ma ma uh a ngai hi. I kochuam suse thei ding thilte chu hangsan taka do ngam ding a hi. A langkhat lam a belamte anpha pe thei dingin nasa taka pan lak a pawimaw tak zet hi.

# “KHANGLAITE LEH SEX EDUCATION”

~ Rev. Ph. Thianneilal Vaiphei  
i/c Delhi Presbyterian Kochuam

**S**ex kiti hi sappau a chun a nû leh a chal hetkhenna mimal in a nei; zamaw, zun-thakna lam tawh kisai, taksa bâk min khat genna mai a hi. Sex intercourse a hileh chu numei-pawsal kitimatna lam pang genna a hi kit hi. Himaleh, tulai mite'n 'sex' kiti hi numei-pawsal kitimatna leh tatsual genna'n a mang tângpi ua, zilchian a pawimaw ma ma hi. Ziagual ah 'numei leh pawsal tibâk – kitimatna leh suan leh pâk sukpunna taksa bâk chu a hina gual tak ah suichian/zilchian chu 'Sex Education' ti a hi. Sex hi mimal thil, gen ngailo (taboo), zamaw lam genna lam chau in i ngai ua, zia lam tawh kisai hiat ding pawimaw thil tamtak ngaisak loin i kawi ua thil phalo tamtak a hing dawk sek hi. Sex Education hi Family Life Education le a kiti sek hi.

## **Sex Education pawimawna:**

Sex Education ti hin tatsualna lam chau ah kivenbit ding dan kiziltilna hilo in, numei hina leh pawsal hina hawi taka siamtu'n ei siam dan pawm ding ah kiziltilna le a huap vek hi. Numei khenkhat pawsal um ah um ziang tite; pawsal khenkhat numei um

ah um ziang tite hi ei siamtu ei siam dan pawmlona leh helna (rebellion) chikhat a hi. Nu leh pa'n le zia chungchang bîk ahin mawpuakna lian tak i nei ui. Cha numei dawi ziak ah pawsal chu numei siam ah siam tite, chapa i dawi ziak ah chanu pawsal siam ah siam tite hin chapang lungthim



no dil del chu siam siat ziang thei a hi. Naupang bangma hia nailote hi tungman gual a hiu a, la daw gual gual in la siam daw thei hi ti hia'n. Mi lopi tak leh a hina gual gual ah numei suan um, pawsal suan um leh lawting tak in la siam thei hi. A hilona lam taka la siam daw chun mi lawting hi malak sangin mi nuizat bûk, khawlai mi gensim, khawtâng sunawpkhak, mi laklaw siam dawktu hi thei la hi. Chuleh, a numei/pawsal hinau hile hawi taka hilchian a ngai hi. Kum 13/14 a tin u chun numei in thasin thi (mense) hun nei intin, pawsal chun le mul hung nei in, a aw le hung kikhel in a. Zia lai tak hileh tisa nawpna nei ah a zat lai tak uh a hi zia kin venbit leh hilhiat a ngai ma mau hi. Zia hun a hin sex lam ah khatvei a chetsual u chun a hinkhuau ah chiakhial pek thei a hiu. Numei leh pawsal kitimatna (sex intercourse) hi Pathian in nupa chau mat ding ah a siam a hi. Zia chule suan leh pâk neina ding ah a

phal piak a hi (*cha nei theilo khenkhat um maleh, a thiltup chu suan leh pâk nei di chu a hi*). Nawp sakna ding leh hûkna ziak ah numei-pawsal kitimat a, nau vawp lona dinga damdawi nek, nau sukthâk tite hi Bible kal, Pathian zalona a hi.

Tulai sex pawimawna hechian lo leh zilchian loin tisa nawpna sukthâkna ding ah mang a hung pung tul tul tai. Ziate chun suan leh pâk sukpunna ding hilo in tisa nawpna sukpitinna ding ah numei leh numei kikhawi piaktua; pawsal leh pawsal kitimat tite a hi. Sex Education hi kihil malak sang ah gendaw hile gitlona chikhat ah i ngai khâk ziak un i khawtâng hinkhuau (social life) gingtu hindân tawh kituak lo, Khristian hindân pha tawh kikal tatsualna a hung pung nasa ma ma ziang hi. Ziakiachun, i taksa ah um thil pawimaw tak, i matsual leh i chi leh nam natiang in a mualphopi thei thil a hi ti

## HINNA VÂK

hian i zilchian ua, mimal leh khawtâng hinkhua Pathian dawi gual ah i mat dik theina ding un pan lak a hun tak zet tai. Sex Education hawi tak ah i zilchian lo ziak un i gam un zia a nuai ah kigente hi a kithang ma ma a, hawi tak ah i zilchian thei u chun ziate hi kivengbit thei ding a hi.

1. Pawngsual thubuai a pung tul tul hi.
2. Khanglaite lakin lungkham mangbatna (anxiety) a pung hi.
3. Lungthim buai natna (mental illness) a pung hi.
4. Huk leh kingaina lam video (pornography) et zalenna a siam hi.
5. Naupang cha zu dawn leh dumzial chep a punsak hi.
6. Pathian siam gual ah um nawplona a pung a; LGBTQ kiti community thak a um dawk ta a hi. Zia umzia chu **L-Lesbian** (numei leh numei tasual); **G-Gay** (pawsal leh pawsal tasual); **B-Bisexual** (numei

leh pawsal tatsualpite); **T-Transgender** (Tuai leh patil ah kisiam); **Q-Queer/Questioning** (numei hina/pawsal hina buaite, mi nuizatbuk te) i society ahin a hung pung ta zel a hi.

7. Numei-pawsal kitimat hun leh a dan tite i hetchian lo ziak un nupa kiningtelna a piang sek a, tichun nupa kikhenna hial le a tung sek hi.
8. Zil thiam lo nana na chu nupa nun ah kidawi khawplona a pian sak a, tichun, ângkawmna leh zawntatna a supung sek hi.

### **Bible leh Sex Education:**

Christian leh Sex Education tî'n le a gen thei hi. Christiante lak ahin sex education hi thipsan leh ngaisak lo a hi sek hi. Bible in vang a thipsan pua, zia chungchang ah hiat ding pawimaw tam tak a gen hi.

1. Numei leh pawsal kitimatna (sex) mang ah pumkhat ah siam chu Pathian lunggel a hi (*Gen.*

- 2:24). Numei leh pawsal chun kitimatna (sex) hi a ngaicha gel gel ui.
2. Numei leh pawsal chu Pathian dawī dan takin kicheng uhen (*1 Cor 7:2-3*). Miten sex hi Pathian thilpiak lopi tak a hi zia leh thil thiangtho sukbuak lo ding a hi thu hia tau hen (*Gen. 29:2-3; 9:21-23; 2 Sam. 10:4; Deut. 27:20; Heb. 13:4*).
  3. Pathian in mihingte a hung punna ding ua kitimatna (sex) a siam chu pha a sama ma hi (*Gen. 1:27-31*). Kitimatna hi nawpsakna ding leh lungawina ding ah siam a hi (*Solomon La 4:10*). Zia hin kichenna chu a sunuam in kilungsiatna a phudet hi.
  4. Kitimatna hi kichenna ah mat ding ah siam a hi. A mang kha te chu kichen ngal hawi in a. Pathian siam dan takin sex mang tate chu kicheng a hi tau. Kikhen ding lunggel a um chun a thiammaw hi ngal in a. Pathian in mihing a siam chu numei leh pawsal thi tiang ah ginum ah, a tawp bei ah kihepitua a, dam sung ah umkhawm ding in a siam hi. Tichun, sex hi kicheng lote, lungsiatna det neilote leh nau neina ding hilo ah mat ding ah siam a hi puai. Himaleh, vangsiat um takin mite hin Pathian dawī gual ah um chu a zui thei ngai puau a, thumat lo zia kin sexually transmitted diseases (STDs), tatsualna te, insung keksiata leh nupa nun limlona te a hung um daw k sek hi. Ziakiakachun, kochuam hi zia chungchang ahin a thip mai mai ding a hi puai. Sex kisiamna zia kha gen a ngai in, khristian sungkuan nu leh pa te'n le sex chungchang ah pilvan ding dan leh matkhial a lau um zia hi nasa zaw diak ah kihil a pawimaw hi. Sex lam ah mi a hung ginum chun taksa leh thagau ah

## HINNA VÂK

damtheina, inkuan damna, nupa damna leh khawtâng damna a hi. Sex mat dik chu kochuam hina taklatna leh khawvel mite laka danglamna a hi. Sex mang dik lote chu a suan -a pâk ten hansia a dawng sek ui (*Gen. 3*). Sex mangsualte, angkawmte leh zawntatte demna thu Bible in a gen hi (*Rom 13:14; Mat. 5:28; Rev. 14:8; 1 Cor 7:1-2*).

### **Sex Education Chungchang ah Kochuam mawpuakna:**

Kochuam mawpuakna chu pakhatna, nu leh pate training piak ding. Nu leh pa a ginum lo ua leh chate chu hil hak sa tak a hi. Panina, Sunday School, Sermon leh Seminar paper ah mihing Pathian in ei siam dan lûl ziate, ei siamna ziate leh mani hin di dan taka um lûl ziate kihil zel ding a hi. Pathumna, kochuam hin thudik/thu tak ah khanglaite a hin ua thianthona a chawisan ua, tatsualna a huat theina ding ua ziltilna piak, sex chungchang ah buakkaite

chu kochuam dan ah thunun chet chet mai ding a hi. Palina, numei pawsal gual ah um, pawsal numei gual ah umte hile nu leh pate tawh pankhawm ah a pitin mau ah suk dik ding a hi. Pangana, numei leh pawsal kiguizawpna hi Khrista leh Kochuamte kiguizawpna etsakna a hi ziate kihil tam ding, ziagual zel ah numei leh pawsal chu hepina thiangtho leh det (*permanent*) ah kihepi a, kichen hi mi zosia mit mu ah zabawl ding a hi ti etsaktu (*model*) ah pan chiat tup ding a hi.

### **Sex leh khawtâng hinkhua:**

Nagate chun numei leh pawsal tatsualna a umlona dingin khawtâng leh CSO te'n pan a lak dân uh khu a nasa ma ma hi. A huaisia lam ah le gen thei a hi. Pawsal ângkawmte chu a in hâp langkhat a phel piak mai sek ui. Nam dang pawsal a nungakteu hun khawisiate chu a zamaw sulang in, saguak in mipi lakin a kai ua, vawk leh jep tawh thua in, a câng leh a that mai sek ui. Ghana gam

ah chêng Akan namte khun le numei mi tawh zawntatte chu pathian hansia dawng a hi tiin, a gawtna'n a sam blade in a metkawl piak sek ui. Ziagual lawm ah a ngai thutak ziak ua sawn, sex lam ah tatsualna chu a khawtâng (society) un a vâng ma ma hi. Amau lak akhun pawsal numei gual ah no nem diak duak tite, numei pawsal gual ah gum thet thut, pa het hut a vâng ma ma bawk hi. A um khâk pal chun le khawtâng ah a ta ngam puau. Tangval te'n numei pawsal gual ah umte bang chu a mat un a sawisa ek ek mai sek ui. Tichun, a da a cham lo un a ki numei sak un, pawsal numei gual ah umte chule a aw, a bass tam thei pen in a sua un a ki pawsal sak mai sek ui. Ei lam ah a ki numei siamte, a kipawsal siamte hile tangval/ nungak te'n a la sawisak theina ding un namdangte gual in dan khau tak kinei leh chu pha ten maithei a hi.

**Thukhâkna:** I gen tak gual un sex education leh khanglaite hi a chiakhawm pek in, a kikhen thei lo a hi. Chuti a hi ziakin, Bible hi sim in Pathian thu hi zawm hitiu. Nu leh pate, kochuamte leh khawtâng inle Pathian thilsiam hi a hina ding dawl tak leh Pathian siam dan gual taka thiangtho tak leh zaum tak ah hing i hi theina ding un sex education hi ngai pawimaw thak hitin u, Pathian thu in ei hil gual un hindawpi gua chiat hitiu. A hi di gual ah hing theilo, neukhat che mawilote le hindan dik leh mawi taka a hin theina ding ua panpitu leh siamphat ngai a hi unle siampha pei ding in kisa hitiu. A diak in khanglai ten hin dan dik, lampi dik leh Pathian dawi dan tak ah hinkhua mat dik hi ngaikhawk thak hitiu, Thu pawimaw tak, a chunkhawm tam tak hi si a hi ziakin i gen suak thei pua, maleh, i gen tiang bek uhi zui thei ding in Lalpa'n ei malzawl piak ta hen. Amen

# “BIBLE PAWIMAWNA”

(Psalm 119:105)

~ Rev. S. Mangminthang  
i/c Pillangkata Presbyterian Church (TPCS)

**T**humapui : Tukum 2023 Kumthak mel dawi um tak ei musaktu Pathian kiang in kipak thu i gen masa uh a hi. Kum 2024 Febuary tha ‘Hinna Vak’ a chuang ding Article zik ding a guat a ka um ti ka het a kipat in Bible pawimaw zia, het dan dan a zik ding ka lungthim ah a hung um ziak in tamlo ka hung taklang a hi. Bible hi i ngaikhawk puau tina hilo in, i ngaikhawk na bâk ua nasa zaw sem ah i ngaikhawk zawk diak ding uh dawina tawh ka hung zik a hi.

Psalm 119:105 *“La thu hi ka keng te a ding in thaumei ahin, ka lampi a ding in vak a hi”* tia a la ki zik hin Pathian thu (Bible) pawimaw dan leh phatdan a gen chian hawi mama in a kilang a hi. Zia gual a chun zan a lampi i zawt phat leh i keng ten thingbul, suangbul, lamsak, lamthang, a kuak a bo te i taw khial lona ding un vâk/thaumei i mamaw zing uh a hi. Gingtu kua hileh zia khawvel i khualzinna lampi a bittak a i chia theina

ding ua hin Pathian thu hi a pawimaw jing a hi. Bible hi lekhabu lak lak a ki sun dawk tampen, kizuak dawk tampen leh ki hawm dawk tampen a hi. Bible hi lekhabu dang tawh a kibat lona hi *“Lekhabu dang a thu kizik te hin, pawimaw lo hun (tawp hun) anei sek un, himaleh Bible a thute hin pawimaw lo hun leh mat theilo hun a nei ngailo a hi”*.

## 1. BIBLE HUNG PAWT DAN -

Bible hi mi chuam chuam  
36 (sawmthum leh gup) vel

zet ten, hun chuam chuam leh mun chuam chuam in kum 1500 val lut in a la zik dawh uh a hi. Bible hi Greek (GK) Pau “Biblia” ti pat hung pawt ahin, zia chu lekhabuneu tina a hi. Latin ten “Biblos” a ti kit un, zia chu lekha pakhat tina ahi kit hi. Sâpte’n Bible a ti kit un, zia chu ei hawn le minsak dangte nei chuamlo in Bible tin i mang uh a hi.

## **2. BIBLE HI PATHIAN HATKHUM AH ZIK AHI -**

Bible hi mi chuam chuam te’n Thagau Thiangtho kithuapina tawh a zik uh a hi. A ziktu tam zawte hi mimawl tak tak a hi ua, himaleh Thagau Thiangtho Puina tawh a zik uh a hi ziakin a hing in, thil a hi thei in, chemjam hiamtak sang inle thil a hi thei zaw a hi. Lekhabu dang hi Pathian hatkhum a kizik ti hi a um puan, himaleh Bible hi Pathian hatkhum a kizik ahi dan Ephesians 3:16 in

kichian takin ei gen a hi. Zia chu Bible lamdang bikna pakhat a hi.

## **3. BIBLE HI DODALNA NASA TAK TUAKTU AHI -**

Lekhabu lak lak a dodalna nasa tak tuak tampen leh huatna tuak tampen chu Bible a hi. Rome sawrkar ten le suk mang vek a gua ua, himaleh ala sumang thei diaklo uh a hi. Napolean chun, *“Bible hi lekhabu danglam tak , Lekhabu hing toh thilhithei tak, ama doutute, dawilotute zosia chung a zawna tuntuh ahi sek hi”* tin ala gen hial a hi.

## **4. KHAWVEL MI LOPI LEH LANGSAR DIAKTE’N BIBLE A GEN DAN UH -**

i. Gladstone chun, “Ka Vanglai (hatlai) hun a khawvel milopi 95 ka het te lak a 87 te chu Bible a kinga zing mite a hui a. Bible hung pawt dan hi a danglam bik in, ama pha thei di leh dem thei lekha dang a um tawp

## HINNA VÂK

puai” tin a la gen a hi.

ii. Robert D Lee chun, “Ka buai, ka mangbat tawp khawk hun ale vâkna leh hatna ei petu chu Bible ahin, vâkna leh hatna ei piaktheilo hun a nei ngai puai tin ala gen a hi.

iii. George Muller chung, “Kumtin in Bible hi vel li (4 times) lungthim ah dawina leh a tak tak ah hinpi nawpna’n ka sim suak sek in, kum 89 zet chu khawvel a mi kipak leh limtheite lak in kapang a hi” tin a la zik a hi.

iv. George Washington chun, “Pathian leh Bible tello in Khawvel hi diktakin vaihawm thei tak tak lo a hi” tin agen hi.

v. Zhiang Zhemin chun, “Meithal leh galvan lauum chuam chuam mang ah ei dotute sangin Bible a zaknuai a zep kawm a ei dotu

Missionary te hi a lau um zaw ui” tin a lagen a hi

### 5. BIBLE – GAM LOPITE KINGAKNA -

i. Queen Elizabeth chun, “England gam chun kingakna a danglam bîk a, zia chu sukbei phal hingailo di a hi. England gam lalchutpha hung lua di taphawt chun zia hi hetau hen, Bible hi England gam lawtinna thuguk chu a hi ti hian” ati a hi.

ii. Victor Hugo chun, “England gam hin ngaisan diak pani a nei in, pakhat chu Bible ahi, pakhat dang chu a hi leh Shakespeare a hi. England hin Shakespeare a tung ding a, ahinla England gam siam dawktu chu Bible ahi” tin Shakespeare in a gen hi.

iii. George Washington chun. “America hi Bible in dikna agen gingte zui in achia zing hi, Bible ah a



kingak sung hin sengailo ding a hi” a ti tawp a hi.

iv. Ronald Regan chun, “Khawvel gam dangte sanga lopi zaw diak a tung dingtu a tam hi, zia lak a chun Bible gual a um sem dawk chu a um puau a ti hial a hi.

## 6. BIBLE PAWIMAWNA -

Bible pawimawna hi gen ding tam tak a um in, himaleh gen seng lo ding i hi zia un, tamlo zia a nuai a gual hin pawimaw kasak te ka hung tak lang a hi.

### 1. Bible hi Pathian hung kipuanna a hi :

Bible hin Pathian hi lei leh van leh a sung a thil um zosia siamtu ahi dan a thute, lei leh van leng(lal) ahi dan thute, a kipak lam leh kipak pilo lam te ei hiatsak tu a hi. Mihing sual a puksiat dan leh a chapa Jesu khrista mang a hukdamna lopi tak ei guanggal piak dan thu te ei hiatsak a hi. Bible pansan

in, a dawit dan a hin ding dan tiang in ei musak a hi.

### 2. Bible hi Ginna diklo apat ei veng tu a hi :

Kochuam hung din til apat tuni tiang in gingtute lak ah ziltilna diklo hiat ding a tam mama a hi. Thagau min mang ngal himaleh mani dawit dan dan a chia Bible tawh kituak keilo le a um sek a hi. Zia haw hi Bible tawh a ki tuak na em? a hilou leh Bible in a um na em ti hiatna ding in Bible mama a pawimaw a hi. Ziakiak chun ginna diklo apat i kiven hawi thei na ding ua phapen chu Bible chauh hi a hi.

### 3. Bible hi Thagau An hi :

I taksa ahat a, na hawi tak ah a sep zaw na ding in nisin ah An nivei/thumvei vel nek a ngaisek a hi. An i nek peilo phat leh taksa hat theilo in a basam sek a hi. Zia gual ma chun i thagau dinmun a hatthak thei zel na ding in Bible hi nicheng

## HINNA VÂK

a sim zing a ngai a hi. Bible sim sang in camping vel ahilo leh retreat/seminar vel i ngaisang zaw un, a lang sek a hi. Camping/retreat/seminar/revival crusade te hi pawimaw puai tina hilo in, zia sang a pawimaw zaw chu zingkal leh nitak cheng a Bible sim a hi. Bible i sim peilo lai sia chu thagau lam hin i basam tau tina a hi.

#### **4. Bible hi Pathian in a mite a pawlna a hi :**

Pathian in a mite pawlna ah a mat tam pen chu Bible a hi. Ginglote kiang inle kipuan na'n Bible a mang sek a hi. Lusun, liangvaite thamuanna matchak ding in Bible a la mang sek a hi. Beidawng te kiang in kinepna hing a nei thei na ding ua matchak in a mang sek a hi.

#### **5. Bible galvan phapen a hi :**

Sakhaw dang beltute va bei ding leh mi gilote va kimai tuapi na ding chun

Bible hi matchak pawimaw pen a hi. Zia ban ah chun thitha buak (dawi leh kau) te nawdaw na ding in lekhabu dang hi kuaman a mang ngai puau in, mat thei um sun chu Bible a hi. Bible hi lekhabu lak lak a lekhabu lalpen, thilhithei pen leh chungnung pen a hi. Khristian te thagau chemjam a hi (Eph 6:17) kua hileh Bible sim ngailo gingu chu, Lalpa'n a piak matchak mang ngailo tina a hi. Setan thepna chu a jo lo a hi. Bible i sim phat leh Pathian tawh kinai chan i um a hi. Ziaziak chun Bible hi bangkim a matchak phapen ahi ti hemil him him puai tiu.

Zia a chung ah Bible pawimawna point panga(5) te hin, simtute zosia ngaidan ei siam thak piak hen la, chuleh Bible pawimaw dan leh lopi dan he tam thei ding in Lalpa'n hung malsawm chiat ta hen.

## “GINNA DET” (Matthai 15:21-28)

~ *Upa L.Sanga*  
*S.Munnuam*

**H**ebrai lekthawt zik lam ah chun ginna chu “*thil kinepna te hum ngei ah hiatna , thil i mu nailote hiatchianna a hi*” (Heb. 11:1). Zia lai tak ah ginna kigen chiandan hi, tulai mithiamte, Scientists leh technology lam ah thiamna sâng tak tak nei te mit ah kipat thîl in, umzia um lo ma ma ding in a gingchak um hi, a ziakchu, tulai a hin muthei ngei, khawi khâk thei ngei, patep thei ngei zilchiannate chu a tak leh a dik in a pawm tângpi tau a hi. Ziaziak chule hinger in a, i Bible, i Pathian thu te’u, Khristianna te hi sawisel leh demsiat in a um nasa ma ma ta a hi. Zia dungzui ah chun zia tak lai tak ah kigen ginna hile zia gual ah Pathian gingchakna tawh panglo thiamna chun a dem ngei mai a, a nuisan a hi. Ahinla, gingtute â dinga chun ginna panglo hinkhua chu a hi theilo gual tuk a hi ziak in, a hechian leh a tepta te â dinga chun zia lai tak Pathian thu’n a gen hi, um zia nei tak, mi tam tak kingakna a ting hi.

Khawvel changkâng zel leh khangto zel hinkhua hin pu leh pa khang ah pat gingtu hitate suan leh pâk lak in le ginglona a hung pung na sa ma ma ta, ginglo le hilo, bawl mai mai, um mai mai, sem mai mai, tawi mai mai, a mai mai ah tat khawlaw ta khangthak tulai hin i tam ma ma ta a hi. Zia sang a le khawk zaw chu i

khangthakte lak in Pathian Um gingchalo tawp (Athiest) a guk guk in a pung nasa ma ma ta, insuan tin ah, kochuam tin ah nasa tak in pan i lak uh a ngai ta a hi. Bang i pawimawu em? bang i mamawu em ti kidawng ta leu hin? Keima’n mawl mil mial ah ka dawnhuna ding chu “*Ginna det*”. Ginna det ti i gen thei chun, ginna det lo a um ngei ka gingcha a hi.

## HINNA VÂK

Ginna det chu Hebrai lekthathawt in a gen tawh saisan ah mawl mil mial in hilchian ding hile'ng, "bang gual dinmun tuak ziang leng le kinepna tâwplo a um ngei ah hiatna, mukhaklo le himai thei, mu nailo le himai thei ahinla, kichiantak ah hiatchianna, det tak ah a sul'ng thei ding um lo kinepna vâk ei pe tu a hi". Zia i hilchiannau a pat a hin Ginna det chu, zia khawvel hin mamaw deu deu, pawimaw deu deu ding in a kilawm hi.

I ginnau susia thei ding thiltungte, tuakhiat (experience) te, thiamnate, khantonate leh a dang dang a tam ma ma ziang ta a hi, zia lai tak ah hin Ginna det, Khrista ah i ginna det ti lo ngal in ei humbit zo lo ding a hi tai.

Tuni hun a hin, Kannan numei pakhat in Ginna det tak tawh Jesu Khrista kiang ah a thil daw i a dawtna chung ah kipat hin Ginna det tulai Kochuam te â ding a le pawimaw zia leh lul zia zil ding i hiu.

Lal Jesu chu Tura leh Sidon bial lam in a chia, zia gam ah kipat chun Kannan numei

pakhat a hung ah, Jesu chu a mu ngal hi. Jesu a mu mu ah chun, thil dang, a nawk a nel a gen pua, a thil daw i leh tup pen a chanu thitha'n a mat thuak gim ma ma nu sukdamna ding thu a gen ngal hi. A khatvei na'n "LALPA David chapa, ei lungsiat in; ka chanu thitha'n a man hen, a thuak gim ma ma hi tin a hung kiko a. Himaleh, ama chun bangmachan a la dawnhu puai. Chun a nungzuite a hung ua, zia nu hi i nung un a kiko ko ngal a, sawl mang ziang ta'n la a hung tiu a", zia lai tak ah Lalpa Jesu leh a nungzuite nungchang hi a mak khawp mai hi. Ti hin a gen zawm nalai ah, "Israel nam lak ah belam mangte kiang bep ah sawl ka hi" a bân in "Naute vaithum lâk piak ah, uichate kiang ah piak ziang chu a kilawm puai". Zia cheng thu a gen zaw tiang a le Kannan nu nungchang leh ginna det zia hi i suichian ua, i zilchian ua, i nei ua, i hinpiu a pawimaw in ka hia a hi. Thu pawimaw lâk daw k thei ding te chu:

1. Lal Jesu'n a hona hin tulai giingtute hi ei kiho ngei

ngei leh Kochuam ah um ding kuama kium ta puan a. Lawiupate paukhalna ding leh sukkhal ding hawl a kitam ma ma ta, thil neu chakhat buaina a um ngei ngei leh a nuak ding ngen kihi ziang ta, Kochuam puitute leh Pathian nasemtu te ziang inle thudik leh i hina dik tak tak ua le ei kiho ngam ta lo khawp in i nemzûl gam tau a hi. Ginna det a tâksap ziak a hi ngei ka gingchai.

2. Kannan numei nu hin, Lalpa Jesu leh a nungzuite'n a lim sak nuam lo lai ua le, a matchak leh a suanpi pen chu a ginna a hi, ginna tawh kingainiam tak in Lal Jesu kiang in a va dawn tun tun hi. Tulai khawvel a hin chu, i dawî leh tupte i sukpitinna ding in be leh phung, mel hiat leh chanau niksa kisuanna gam a hi ta, ginna det tawh Lal Jesu ma ang ah kingainiam tak ah khûn ngut ngut kivâng ta a hi. Zia hin, gingtute hinkhua a sunêp ah, Kochuam leh khawtâng nasa tak in a nat sak khawlaw sek hi. Ginna

det tak tawh Lal Jesu bep suan zel i kizil uh leh i kingak uh a pawimaw tak zet hi.

3. Kannan nu hi Jesu Khrista hin uicha tawh tekhn in a ginna a patep hi in ngai thei in a. Zia lai tak hi a hi, tulai gingtu te'n le i zil ding ah pawimaw chu. Lal Jesu sukdamna leh panpina channa ding a hin, nuam tak leh bailam tak in i chan gua sek ah, i ginna ziang le patepna tuak nai lo in i la kizûk kit man ta sek hi. Lal Jesu'n kannan nu chanu a sukdam nuamlo a hi pua, a ginna a enchan masa a hi. Pathian nasemtu te hin le, patepna zat chuam chuam i ginna chetna ding in i tuak ngei ka gingcha a hi, uicha ziang tawh niam ah tekhn leh kawî ah i um nung ziang a le, Lalpa uicha te'n le a puu dawkân nuai ah an nen khe tha haw chu a luak sek ui ti thei ding ah i um chiat uh i lawtinna ding in a pawimaw tak zet hi. Pathian nasepna leh A min ah kipiakna ziaka Mualpho leh haksat thawk khâk ding i lau ma ma ziak'un uicha guala niam ah patep ah i um

## HINNA VÂK

tak lehle kiko zâk ziang sek Pathian nasemtu i la hikha sek hi, Lalpa'n kingainiam tak ah daw zotu hi zaw ding in ei dawi a hi. Zia chu ginna det, ama Jesu ah ginna bep in a supiting thei hi.

4. "La dawi gual gual in tung ta hen" ti chu Lal Jesu'n kannan nu a dawnhuna chu a hi. A thupi in, a lopi tak zet a hi. Dawi gual gual a tun thei na dinga zia nu'n Lal Jesu ah a ginna det chu a hi i zil ding leh i nei dinga pawimaw chu. Lalpa'n i mamaw leh i pawimawte zosia a hiatlo a hi puai. La In sung buaina a hem, la kawppi kâl a hem, La KKP nasepna a hem, la KNP nasepna a hem, Kochuam committee ah la nasepna a hem ah la thil tuak zosia kha Lalpa'n a he vek hi. Diklo la sak te, la lungthim natna ma ma te, leh a dang dang te zosia kha Lalpa'n a hung hetpi vek hi, ama'n a mu lo leh a hiatlo ah thil tung bangma a um puai, la mimal hinkhua ziang a le bangkim ah a tâwp khawk la tun ah, thina thei dinmun la tun hun in le la ginna det tawh

kingai niam taka dawn ding in i Lalpa chun ei ngâk zing a hi.

Ginna det tak chu mamaw tintenna (desperate) tak kawm ah hawl te kiang lo ngal ah um thei lo a hi dia aw ti thei khawp hial in a haksat zia kannan nu tawh Lalpa Jesu kihona ah kipat hin a mu dawk thei awm hi. A bul lam ah i gen gual ua khan, tu lai In chen lochen ah haksatna tawm ta, damlo kietkawlna leh nisin hinkhua mat dan ah haksatna tawm ta, thiam zilna leh zilsan na awlsam ta khawvel a hin, gingtute hinkhua ah Jesu Khrista ah i ginnau hile nasa tak in patep na i dawng talo uh a hi zaw dia aw a ti thei hial ta a hi. Ahinla, a pawimaw pen chu haksatna zia leh thiamzilna sâh zia ah ginna dau mai ding leh ginna tawm mai ding gingtu i hilo a pawimaw hi. Bangtik hun: nawpsak, haksat, genthei, damlo, dam hun, hat lai, hatlo lai ziang a le ama Jesu ah ginna det tak tawh zia khawvel ah i um sung ah a nâ sem ding in i kisak zaw zing a pawimaw in a kul tak zet a hi.

# “KUMTHAK 2024 LAMTUA DING IN BANGGUAL NGAITUANA LA NEI EM?”

~ *Upa L. Paua*  
*New Lamka*

**K**um 2023 sung ah mi hawi, mi pha leh mi pamai tampi'n thanmual ei liam san nung ua, kumlui mangzo thei leh kumthak 2024 lamtua thei ding ah damna ei petu Lalpa chu lopina leh chawihawina sangpen i pia masa'u a hi.

## **Kum 2024 hi banggual in lamtua la gua em?**

### **1. Inkuan kisak lawkna :**

Thilguan leh pawimaw khat i bawldaw theina ding in, kisaklawkna hawi nei a pawimaw ma ma hi. Inkuan lawting siamdaw na ding inle, kisaklawkna banggual in i siam uh em? Thupukna thak lak lanei tau em? Kisak khawlna hawitak tawh panlâkna umlo ah vangphat thu inkuan lawting mai ti hi vâng mama ding a hi. Job in inkuan etkawlna dan kitup tak a nei hi, a chapa te'n a In ua anekkhawmna siam sek

in, a suapi'u numei thum te le a ko sek ua, nekkhawmna a nei zawu a zing phat leh, Job chu zingkal matak ah tho in, amau chu ko in, a mimal tin uh sukthianna ding in kithawina a changkim un a bawlpiak sek a, *“ka chate hin thilphalo ala bawl kha pal in, a lungthim un Pathian ala samsia kha tawl inau”* ati ziak in a min kim un maicham a siam piak zing sek a hi. Job in inkuan etkawlna dan kitup tak a nei gual in nang la nei thei em?

### **2. Kochuam a ding ah thiltup nei :** Kumthak vaidawn ding

## HINNA VÂK

in Kochuam in banggual  
kisak lawkna siam i nei thei  
em? Kochuam hing leh  
khangto hiat theina hawitak  
chu, thagau mangthai mat  
ding a ngaikhawk dan ua  
hiatthei a hi. Khristmas  
Programme bang le  
kisaklawkna hawi nei kum  
leh kisak lawkna mumal  
neilo kum in a nawpna leh  
a lawtin dan, kibang thei  
ngailo ahi ziak in, tukum in  
kochuam in panlak didan i  
guanggal hawi leh hawilo  
un i lawtinna' u kingakna  
lianpi um a hi.

Kochuam mite Thagau lam  
Anpha a nek ua, hatna a nei  
thei na ding un, Thagaulam  
ah kipawlkhawmna leh  
lungthim pumkhat nei ah  
pauchap khawmna, Lalpa  
dawidan zui ah kochuam  
khanna ding leh gasua  
na ding in a pawimaw hi.  
Gingtu masate hindan apat  
zillai hawitak muthei te chu:

- 1) Nisin Temple ah hun  
mangkawm.
- 2) Lungthim kipak tak ah a

An te' u nekhawm

- 3) Pathian pak leh  
chawihawi hun neisek

Zia gual ah pan a lak sekna' u  
apat hung ga dawk chu, a  
lak ua pat hukdam ah um  
ding in nisin belap in a um  
zing sek uh a hi.

### 3. Khawtâng a ding ah panlak:

Tulai khawtâng hinkhua i  
gel phatleh lunglai a dap hi,  
malai khawtang hinkhua leh  
tulai khawtang hinkhua hin  
kibatlona liantak a nei hi.  
Nidanglai in migilo chu mi  
zosia'n puaknat na a ki nei  
in, pha ding ah dawisakna  
tawh thu hil ngamlo ki umlo  
ahia, tulai chu melhiatte  
ziang le a siatnau hil a,  
siampha ding ah pan lakpi  
ngamle ki umtalo, Samari  
mipha pa'n thilpha a  
bawldan zillai hawitak, Bible  
in ei kawkmua kha i gel chun,  
mi genthei leh liangvai,  
taksa leh thagau ah panpi  
ngai, thûm leh mau tampi  
ten eila ngak zing ui. Amau  
panpina di'n i sum leh pai,  
i tha leh zung a mamaw



zing ui, pauchappi ngai, Lalpa hepite a hiu, amau panpi lo ding maw, panpi a ngai mamau hi, a leng ua a manthai zaw mau in.

#### 4. Midangte ding ah gasua :

Nangun lei tel uh kahi pua, himaleh, keima'n nang uh ka hun tel zawk lahiu hi, la chiau a, ga tamtak la sua theina ding un, kahun namdet lahiu hi, la gau le a um zing theina ding in, zia ziaka chun ka min ah Pa kiang ah la dawt taphawt uh chu, hun pe ding a hi. (Johan 15:16).

Lalpa'n ei telna ziak, gasua di ahi ti i mu gual in, gasua ding ah ei teltu Lalpa dawidan suk pitin di chu eimau ah kinga a hi. Thil khat bawl ding ah teldaw ah i um phat leh amasapen in, bang nasem ding ah ei tel uh ahi em? ti i sep ding, tel ah i umna ziak chu hiat tei tei ngai a hi; zia ngei chu sem dinga i kipat a ngai hi. Lal Jesu'n ei tel a hi'n, ei telna ziak hawitak in ei

genchian a, i sep ding uh kichian tak ei hil chu, gasua ding a hi. Gasua ding a ei tel ahi lai ah, gasua ding a hi. Gasua ding ah ei tel ahi lai ah, gasualo chu thumanglo leh ei teltu lungthim sunatu hi di ihui. Theichang kung gasualo kha, phuk mai in, mun le a lua hi a ti gual in, ei teltu Pa'n ei telna suk pitin chu mi pha leh mi pitin hin didan chu a hi.

#### 5. Bangti'n Ga isua diam?

1) **Kampau in thupi tak in gasua thei a hi:** Kam a pat thupawt in a sia hi'n a pha hileh thupi tak in ga a sua thei hi, ti hawitak in he leuhin kampau ah pilvan ngai ahi ti hechian hi tiu in, kampau matdan a lawk ding a mat i tup chiat ua, gensiat na leh hansia kilaw tite i chin lo diu a hi. I kampau dungzui ua hi hung guitung di ahia, a ga chu i nek ding uh a hi. (Thupilte 18:20-21)

## HINNA VÂK

### **2) Kampau dungzui ah thutan piak hi di :**

Mihingte ngaituana'n pauchapna i thugente leh pulpit chung ah thu kigen te bep hi Pathian in a het, mundang ah kigen haw helo ah ngaitua i hithei hi, a hinla, Lalpa'n eima kampau ngaitha ahi ti ei hil ziakin pilvan ngai a hi. (Kisimna Lekhabu 14:28)

### **3) Kampau zosia Lalpa'n a he'n a tepte a hi :**

Lalpa chun keima demna thu khautak tak in la gen tau hi a tia, kampau zosia a hesuak in, thupha gen ah Lalpa laute kampaute le a tepte a hi ti'n ei hil hi (Malaki 3:13-16). Kampau in Lalpa a sukিপак sak thei in, a suk lungnat thei a hi zia in pilvang tak ah kampau mat ngai a hi. Pathian mitmu leh mihingte mitmu kilawm kampau mat hi i bawl ding dan uh chu a hi.

### **4) Pauchapna'n Gasua thei a hi :**

Jawlnei Elijah

pauchapna zia in kum thum leh kim gua a zu pua, a pauchap kit phat in gua a zu kit hi. Van ah pat mei hung ketha in maicham a kangtum mai hi. Joshua pauchap zia in nisa leh thapi ni khat pumlum a chawl mai a hi. Pauchap na'n damlo ten damna a chang thei tau a hi. A mi thiangthote pauchapna'n thil lopi tak a bawl thei hi ti ei hil hi. (Jakob 5:15-18)

### **5) Lalpa muang in a thu ah kinga'n :**

Lalpa hi a thu muang ngam mite chung in a kipak a hi. Israel nam sawmleni gam entha kuante a hungtun kit ua, mipite kiang ah report a piak ua kha, a chiana' u gam kibang, a thil mu ule kibang, a gam umdan, a thai chi hawi dante, mite hatdan leh let dan, kul thupi dan zosia a mu chiat ua, himaleh mi sawm te'n, Lalpa muanglo in a lauthawng thu gen a gen ua, mipite a sulau thawng

zo tau ua, Joshua leh Kalbe bep in, lungkham kiu in, i chung ua Lalpa a lungdam ahi chun gam ei pe ding a hi. Bawngnawi leh khuaizu luanna gam ngei chi ti'n a gen ziak un, Lapa chu amau teni chung in a kipak ma ma ah Kannan gam in a puilut hi.

Lalpa lopina ding leh a dawigual sem piting ding in, midang te'n Pathian phatna leh hawina a mu theina dingun pauchapna thil hitheina mangcha'n, kampau mantam leh pilvang taka damsung

ni matgua chiat leuhin mi mantam hi ding in Lalpa'n ei mangcha'n, mite a ding ah malzawlna tuntu hi ding in Lalpa'n ei dawi a hi.

Awle Kum 2024 hi Inkuan tin a ding ah kisiam thakna kum, Kochuam tinte ding ah Lalpa lunglam sep butinna ding ah panlak thak kum, khawtang hinkhua siampha ding ah kalsuandaw kum, chuleh Lalpa lopina mite'n a mu theina ding ua ga suana leh i chung ua Lalpa lungdam kum hi sak gua chiat leu hin maw? Ti'n iki chial uh a hi. Simtu zosia Pathian in hun malzawl chiat ta hen!

---

## **SUM KHAWL HI**

America mi hausa mama, John D. Rockefeller (1839-1937) chun a hausakna ziak chu '10-10-80 dân' a zui ziak a hi ti'n a gen a. A umzia chu a sum lawdaw zosia apat in Za lak ah sawm (Sawm a pakhat) chu Pathian a ding in a pia, Za lak ah sawm dang chu a khawl ah, a vâl Za lak ah sawmgjat chu ama pawimaw na ah a mang sek hi, tina a hi.

Pathian kiang ah sawm a pakhat i piak lo ah, i khawl lo ah, i lawdaw zosia a pat i khawsak thei diaklo ahi chun ki etchian ngai ma ma ding a hi. Lawdaw sang ah matzaw a tam chun leibat a kûl a, leibat ding a haksat hun in gûkchakna a nai sek hi. Zi aziakchun, sum khawl hi Thagau lam hinkhua a ding ah kithunna pawimaw tak a hi.

---

## “DIKNA PATHIAN BÊL IN” (Sam 37:1-6)

~ *Pi S. Melody*  
*Kangvai*

*Mi nunsiate zia*k* in kihilungngai kin la, diklo tak ah bawlte chule êng diak kin. La umdan ding chu Lalpa chung ah nga’n. La dik zia chu vâk gual in hun latsak ina.*

**T**uchung Meitei gâl ahin zildaw ding tamtak hung kilang daw*k* a um hi. I In te’u hal in ei un amau In hal in ei ngaw ua, ei that ua, ei un amau i tha gual in a gen ua, a hung bulu ua, ei un amau i bulu gual in a gen ua, gamdangmi leh narco-terrorist te’n ei ngaw ua, i dikna te’u le gentheilo khawp in ei kawi ua, ahin thudik chu awl awl in a hung kilang zel a, i dik dan uh hechiantu sepaite chun ei dinpi zel ua, i melma lau um tak te’u inle bang eilaw thei diak puau a, i dik zia uh chu vâk gual in a hung kilangzel ta a hi.

Ziagual ah tuni tiang ah i bitna zia*k* uh chu thudik ah i pan zia*k* ua Lalpa panpina i chan zia*k* uh leh Pauchapna tamtak tawh gal i do zia*k* uh a hi. Zuauthei hat ah pangte chu tuhin Babel In sa a bang ziang tau hi. I khawsaknau kawng bangkim inle thudik i dinpi nak uchun zotu hizel ding ih*iu*. Ziagual ah ei panpitu Pathian

chu i bel zing diu a hi. A gam leh a felna i hawl masak phawt nak chun nasemlo vachate nek ding pia ah, pat kheklo gamlak Lily pak te chu Solomon kizepna sang ah kilawm zaw ah siamtu Pathian chun i mamaw bangkimte ei pe ma ma ding a hi. I chung ua Lalpa a lungdam nâk ahi chun i gilki*al* hun in hampa hing dip dep munte ah

ei pui intin, i dangchâk hun in tui kiting dai hiai hiai munte ah ei pui zel ding a hi.

I In i lo te' u kang ah khawsak dingdan buai tak ah um hileu hinle a gam leh a dikna hawl masa ah Pathian belte ihi nak u chun tuitak ah imu thei tho ding ihiu. Danial chu Sakeibaknei kul sungah tuitak in a imu thei a, Peter chule suangkul sung ah a imu thei a, Jesu ngeile thigawpi hattak lak ah lawngsung ah nuam tak in a imu thei hi.

Ahinla ei panpitu Pathian bel lo ah, i pauchapna te' u thatham a, eimau hatna suang ah Pathian i taisan khak u chun imut mawna leh guallelnate chu i mabâk uh hung hithei zing a hi. Israelte le Pathian a kihei mangsan phat uleh

namdangte khut ah suak leh sal ten a um ua, a gam uh ngai in a kap ngawi ngawi sek uh a hi. Pathian in ama chu No. 1 ah kawi zing ah, ama tawh kipawl zing ding in ei dawi hi. Ziaziak chun Thupiak Sawmte lakin keimalo chu Pathian dang nei kin ti chu amasapen in a kawi a hi.

I gamsung ah khamthei chinna mumpite, zu huanna mumpite sukthian nawp ziak ah Pathian in ziagual thilte ei tuaksak le hithei ahi zinglai ah i gam buaina ziak ah khamthei lam ah lut thuk deu deu na ah i mat khak diu thil tizat umtak a hi. Pathian temple i taksau chu suthiang zing in Pathian chu bel zing hitiu in, i pauchapna te' u thatham lo in panla zing hitiu.

- 
- Khrista apat ka zâmmang sang in, ka samzang zat hinna nei in, a zang khat khat ah haltum vek têt zaw'ngka

~ John Ardly

- Hun lemchang in gûkchakna a siam hi. ~ Francis Bacon

# “LUNGCHANG THAK” (Ezekiel 36:26)

~ N.Ginlalmuan  
New Lamka

*“Lungchang thak hun pia’ng ka tin, la sung ah thagau thak hun koi ta’ng ka; nangma taksa ah kipat suang gual ah tâk lungchang chu ladok ing ka tin, phe gual ah nê̄m lungchang hun piang ka”*

**T**hagau lam hukdamna ding ahin mihiamte’n bawlthei bangma ki neilo a hi. Hukdamna(Pianthakna) ding a leisiat mihiam te’n i bawl thei(contribution) um sun chu i gitlonau hi a hi. Hukdamna thilpiak leh hukdamna nasep chu Pathian a ahin, Pathian apat liau liau ahi? Ama hepina ziaak bep a ginna chun zia Pathian apat thilthawn piak hukdamna chu i chang(i nei/received) a hi.

Jesu Khrista tatsate (redeemed) chu gingu Khristian kiti te ahiu hi. Zia tatsa techu Pathian ading a Kochuam te chu ahi tau hi. Hukdamna chu dan leh dun leh biakin vai a kibawl kawm zui ding chi chuam chuam te zui kim ziaak a kichang ahi puai. Baptisma chan ziaak ahem, Lalpa zan An(communion/sacrament) nek ziaak ahem ahiloleh Biakin a dan zokim

min khumna(register) zik lut ziaak ahi puai. Dan leh Hepina khen thiam angai hi. Mawk pawlkhom(mix) lo ding a hi.

Achungahi Bible châng suklat in agen gual in Lungchang thak(new heart) chu Pathian in ei pia na em? Khristian kiti khat chu lungchang thak anei tei ding a hi! Hukdam ihi apat in lungchang thak, ngaituana thak, lunglutna thak, mu nop et ut leh gennop athak, sim ut

leh khoi ut athak i nei tei tei ding a hi. Pianthak ma tawh kibang talo athak ei a umte bang bang ahi diam? Lekhabu a zik dawh ding hile hin bang bang ei diam?

I Pianthak hun ahem Pianthak ni kha i limna pen ni ahi khâk leh vang chu Piangthak khial kihi ding a hi. Pianthak hun apat Thagau lam an kibang zing ihi em? Khantona leh pitingna bangma nei chuamlo ihi chun Khristian kiti ve sam hinla hukdamna lungkham um hikha ding ihi. Hukdamna kichian neilo te ziak in Khristiante ginna hi adiakin ginglotute apat demkai mama a hi!

Pathian in thinlung thak ei pia tai ti a tângkopi ngam ihi na em? Thinlung thak nei tak tak ihi chun im zaw ding gual hilo a hi. I hinkhua mat dan, nek leh dâwn dante leh bangkim a i khuasak dan in thinlung thak piak ihi na em, thinlung thak nei ihi na em tichu het thei mai ding a hi. I thanop nate, nuam isakte leh i limna

te kha Pathian lunglam leh ama lopina ding ahi na em? Ka hun tam zaw ka suk beina apat hin kua hem ka pathian tichu hetthei mai ahi awlsam takin! La pathian kua ahi em Unau?

Tuni hin kingaitua hitiu, zia hi thu ngainawp um vang ei puai hinla thutak i hiat poimaw a hi. Upat tâk ziak ahem, kochuamte'n zui ding ah dan a siam kawm te'u i zui ziak ahem, thawlawm i tuak phat ziak ahem, sawmakhat i piak ziak ahem in KHRISTIAN(HUKDAM) ki hilo a hi.

Pianthakna chu Pathian thumatna in aki chian mai a hi. Pathian ginna dik tak chu Pathian Thumatna in azui ding a hi. PIANTHAK ziak in Thilpha bawl a hi. Hinla Thilpha bawlziak in pianthakna kichang ahi puai. Thugen thiamte, revival speaker te, testimony gen ziak ate, camp lut ziak ate, altar call a va din daw chuam ziak te in Pianthakna kinei ahi puai. Piangthakna chu Pa Pathian nasep ahin, Thilmak leh lamdang(mystery) a hi.

## HINNA VÂK

Hui(wind) aki mutheilo vang in a nungna lam hiat thei a hi. Ziagual bawk chun Pianthak hinkhua umzia chu ama hinkhua leh Thagau ga apat in haksa lo hial in hiat thei ahi mai hi. Ei zia kin mite'n Pathian thu lunglutna leh thanopna anei diam uh? Ei zia k zawk in mite'n Mission workers te ahem ahiloleh Kochuam thilte muan zawlona leh thulâklona anei zaw diam uh tihi dawtna pawimaw tak a hi.

Nang leh kei ei hechian Pathian hi i neilo zia k leh i hetchianlo zia k ua hin Khristian hina leh Khristian ginna hile ei mau phasak dan in i chiapi gam tau a hi! Pathian hi hepina dim bep ahipua'n Pathian hi a thiangtho gitlo(khelna) tawh umtheilo, a lungna thei a hi. A lungnatna[wrath] lauthawng umtak tawh mihiamte vaihawm khum in gawt ding ahi!

Zia Thinlung thak chu piak ihi nailo chun hukdam hi nailo,mi

piangthaklo Khristian lêm hiding ihi. I dinmun sia mama ta siamphatna(remedy) um sun chu mi gilo, sual hi kisik a, Lalpa Jesu, bel ding chu a hi. Kisik a Pathian lam pat hun hi kikhel thei ahia, thinung leh gawtmun a kisikna in bangma pachuam talo ding ahi ngal a. Pathian i bêl nawplo hun, Pathian i limsaklo hun hi ei a ding ah hun pawimaw laitak hiding a hi. Dan phat tak leh bel nuam tun tun in ki ko ko leng le bel theilo hun hung tung phut thei zing ahi.

Chunglam apat thilthawnpiak lungchang thak i neina ding in, itlo a pia pa Pathian kiang in dawn hitiu.

*Bible Pathian Thu sim ding te;*

*Joh. 3:8 ; 1 Peter 1:3*

*Joh. 13:35 ; Joh. 1:12-13*

*Isa. 43:7 ; 1 Sa. 16:7*

*Sam 51 ; 1 Sa. 15:22*

*Gal. 1:10 ; Isa. 26:21*

*Sam 71:11 ; 1 Jn. 1:9*

*Nas. 2:38 ; 2 Ko. 6:2*



**KNP HUANG**

2024 KNP Vaihawm Kikhawp 9-veina hi Imphal Pastor Bial ah um ding ah Vaihawm Kikhawp Vaiguan leh guanggal lawksa hitamaleh hiat lawklo in i gam uh ahung buai a, iki saklawk gual un aki chiathei taklo ziak in CKNP Committee chun genkhawmna nei in a mun ding leh hunguatte etthakna nei a hi.

KNP Vaihawm Kikhawp 9-veina hi New Lamka Pastor Bial ah New Lamka Kochuan Biak In ah Thagau lam thupi *“Mi zosia tawh kicham in um un”* (Rom 12:18) ti mangcha ah March 2-3, 2024 ah mat ding ah guanggal a hi. Vaihawm ni ahi’n 2024 Numei Thuzil *“Sungkuam Hiselna”* (guanggaltu Dr. Asiem ) latna um ding ahin, chun Pathianni zingkal Biakna kikhawp ah Thagau lam thupi ei genpiak ding in Rev. Zosaphara, Consultant TPCS hiding a hi. Gam dinmun hezing kawm in Kiginni ah Vaihawmna leh Pathianni zing Biakna Kikhawp Thagau lam Thupi ngaithak na hun mat ding ah guanggal a hi.

Pathian venbitna chang ah, KNP Vaihawm Kikhawp hunguan ki guanggal hi lawting tak ah mat ahi theina ding in i Pauchapna’u in delzui hitiu.

**KOCHUAM NUMEI PAWL  
VAIHAWM KIKHAWP 9-VEINA  
PROGRAMME**

A mun - New Lamka Kochuam Biak In

A hun - March 2-3, 2024

Thupi - *“Mi zosia tawh kichiam in um un” (Rom 12:18)*

**March 2, 2024 | Kiginni  
10:30 AM**

**Vaihawmna leh Thuzil Lâtna**

Thuzil Bu Lântu : Rev. K. Neihzial  
Synod Moderator

**March 3, 2024 | Pathianni  
11:00 AM**

Puitu : Pi Lhingkhovah  
Pantu : Phailianbung Bial  
Lapawl :

- 1. New Lamka Bial KNP
  - 2. Tangphai Pro. Synod Choir
- Thawlawm : CKNP Phungvukna  
Thupi gentu : Rev. P.B. Zosaphara

## KKP HUANG

### Delhi Branch Dinmun leh panlak na te

Khristian Khanglai Pawl Delhi Branch hi January 7, 2018 in din a hi. Delhi KKP Branch te hi tu kum 2024 in numei 64 leh pawsal 57 ahiu, akigawmkhawm in mi 121 a ting u'i. Ningkum in Biakin hawng ah Kichenna le ala um thei hi. Zia a nuai ah te hi 2024 ah KKP Puitute a hiu:

#### Office Bearers -

**Leader** : Tv. Khailalmoi

**Asst. Leader:** Tv. Paulunsang

**Secretary:** Nk. Hatmary

**Asst. Secy.** : Tv. Steve Chunglemlian

**Treasurer:** Nk. Malsawmting

**Fin. Secy** : Tv. Seiminlun

#### Committee Memberte -

1. Pu George Mangboi
2. Tv. Ngamminlun
3. Tv. Collin K. Neihzial
4. Tv. ST Sangboi
5. Tv. Khamlianthang
6. Tv. Ginthianzam
7. Nk. Eunice Tinglemhawi
8. Nk. Manhawivak
9. Nk. Lamnunnem
10. Nk. Hoineiniang
11. Nk. Nianglemjoy

### Kochuam Ai-aw - T/ Upa Henzakham

Delhi Branch KKP te hin 2024 kum sung in zia gual hin ki guanggal na a siam ui:

1. KKP Day leh Branch KKP kum 6 tinna Programme ala mangkhawm ui.
2. Winter Meet leh Advent Christmas Programme mat ding lemsak a hi.
3. KKP te Group Fellowship Programme nei ding in aki guat ui.
4. Tukum Project in Printer chawk ding lem sak a hi.
5. Kochuam Committee in Building Project a ding ah ₹ 50,000/- KKP te a hung bithiak uh sukpiting tei ding in lemsak a hi.
6. 2024 sung ah KKP Budget ding in ₹ 1, 59, 000/- a siam ui.



**Bengaluru Branch Dinmun  
leh panlak na te**

Khristian Khanglai Pawl Bengaluru Branch hi ni April 16, 2023 in din a hi. Bengaluru Branch te hi kum 2023 in numei 58 leh pawsal 33 ahiu, aki gawkhawm in mi 91 a ting u'i. 2024 kum a hin Google Form mangcha kisimna a nei laitak uh a hia, kisimna a zo nai puau ua, ginchak dan in KKP Member mi 120 – 150 kikal pha ding in aki lam et u'i.

2024 ah Khristian Khanglai Pawl Puitu te zia a nuai ah gual a hiu:

**Office Bearers -**

**Leader** : Tv. Ginlianlal

**Asst. Leader** :

Tv. Kennedy Jangminthang

**Secretary** : Tv. Paukhojam

**Asst. Secy.** :

Nk. Nemchawihawi

**Treasurer** : Nk. Tinglemvak

**Fin. Secy.** :

Tv. Solomon Lamkhothang

**Committee Memberte -**

1. Nk. Olivia Khawlneithien
2. Nk. Thianlemhawi
3. Tv. Pauzalal

4. Nk. Ngaklian kim
5. Nk. Tingdawihat
6. Tv. Emyt Vaiphei
7. Nk. Kimbiakhawi
8. Nk. Lamjoicy
9. Nk. Mercy Tingneikim
10. Tv. Khamminlal
11. Pu Stephen Chhangte

Bengaluru Branch te mun gamla tak tak a um a hi ziak un, Khanglai Kikhawp hi a pangai gual ah a nei thei puau ua, Khanglai um te hi Area ah khen in thakhat ah khatvei ahilo leh ni vei Kikhawpna In khat pen pen ah a nei zel sek ding ua guanggal a hi. 2024 sung a hin Kipawl khawmna – Outdoor Fellowship nei ding in aki guanggal ui. Tukum 2024 sung ah Budget ₹ 2,10, 326/- a siam ui.



# HINNA VÂK

## TV. SUTMINTHANG SUNNA

(1987 – January 11, 2024)



Tv. Sutminthang hi Kochuam leh Khanglai lam ah mi pe zo tak a hi. Ama hi Central Khristian Khanglai Pawl ah 2020 – 2022 term sung in Committee Member ahia, 2022 – 2024 term sung a ding in Finance Secretary in a pang hi. Finance Secretary dinmun tuzinglai in da um tak in eila beisan hi.

Tv. Sutminthang hi mi pawlnawp, mi huaithiam tak a hi. Kochuam ah ala kimangcha ma ma a hia, zia a nuai ahin Khristian Khanglai Pawl ah mawpuakna ala sep hunte a hi:

### **Mata Vengpi KKP Branch**

Leader : 2015, 2016, 2019, 2020  
Asst. Leader : 2013, 2014, 2018, 2021, 2022  
Finance Secretary : 2017  
Committee Member : 2023, 2024

### **Mata Bial KKP**

Leader : 2018, 2019  
Treasurer : 2016, 2017  
Committee Member : 2020  
Bial Choir Convenor : 2022 – 2024

### **Central Khristian Khanglai Pawl**

Committee Member : 2020 – 2022  
Finance Secretary : 2022 – 2024

*February 2024*

Zia te ban a hin Tv. Sutminthang hi Tv. ST Satbawi Revival Team in 2020 a pat in a pang hi. Theitawp sua ah Pathian Lalgam nasepna a pan zing lai in, ni January 11, 2024 nitak dak 9: 00PM vel in Lamka a pat a Veng lam uh, Mata, zuan ah Activa Scooty atai lai in Accident tuak in, aki sukkhakna thuak zolo in eila mualliam san tai. Lalpa a nasep piak Pa angung in zia Khawvel gim leh haksatnate thuak talo ding in ei chawldam san tai.

Tv. Sutminthang hinkhua hi i et leh vanglak ma ma jiang in aki lang ah, Kochuam nasepna vanglak takte a nei ah, insung enkawltu pen a hia, nu kingakna leh enkawltu cha changkhat ahi kit hi. A damsung hi hawmthaw a um ten hi. Ahinla, damsung chawmcha a mat sung hin Kochuam leh Pathian Lalgam nasep na aki mangcha, hinkhua khenkhat huitung taka damsung mang te sang in a semdawk tam zaw ding in aki lang hi.

A hinkhua pamai ma ma mualliam nung in ama suntu, a nutsia a Nu, Insung mite, lawi leh pai leh sepkhawmpi zosia Pathian in Thamuanna pe ta hen!

---

**Editor** : Rev. S. Lama Vaiphei, Executive Secretary

**Joint Editors** : Rev. P.B Zosapthara, Consultant  
: Rev. K. Jama Vaiphei  
: Rev. Th. Samuel Vaiphei  
: Upa Lalminsang  
: Upa S. Lalpi  
: Pi Hawipakkim, Secretary, CKNP  
: Upa Genminlun, Secretary, CKKP

**Business Manager** : Pu Lalbiaklian, Office Superintendent  
TPC Office D. Phailian  
P.O. Box 107 CCPur-795128 Manipur  
Phone No. +91 9089623251  
Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

### A SUNGAH THU UMTE

1. EDITORIAL	01
2. KOCHUAM HUANG	02
3. A KHUTPÊK LOPI SUNGAH	03
4. KA BELAMTE VÂK IN	05
5. KHANGLAITE LEH SEX EDUCATION	07
6. BIBLE PAWIMAWNA	13
7. <b>SERMON</b>	
a) Ginna det	18
b) Kumthak 2024 lamtua ding in banggual ngaituana la nei em?	22
c) Dikna Pathian bêl in	27
d) Lungchang thak	29
8. KNP HUANG	32
9. KKP HUANG	33

Moderator : Rev. Kamkhotinthang Neihzial  
Secretaries : Rev. Thanglianlal (Sr.)  
                  : Rev. Andrew LR Khiangte (Jr.)  
Finance Officer : Rev. S. Khaikhawlam  
Statistician : Upa S. Thongzalal  
Executive Secretary : Rev. S. Lama Vaiphei  
Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



## Pauchapna Thupi:

1. Bial enkawl Pastor-te leh a zi leh chateu â ding in pauchap hitiu. Chuleh Evangelist leh Pro. Pastor-te â ding inle pauchap hitiu.
2. Kochuam tin Naupang Sunday School zilsaktute â ding in; i cha leh nauteu Pathian thu diktak ah a zilsak theina ding un leh Piting zilsaktute â ding inle pauchap hitiu.
3. Pastor Bial KNP Kikhawmpi, KNP Vaihawm Kikhawp, KKP General Conference Taksa leh Thagau ah lawting tak ah mat a hi theina ding in pauchap hitiu.
4. Gamsung buaina ziak ah panlatu pawl chuam chuam ah puitute a ding in pauchap hitiu.